

# Ne Wlalo lo San Juan

## Ne wluu Jesucrist lo Xwa

**1** 1 Laa neree nak ne wluu Dëdyuzh lo Jesucrist, chen yluu Jesucristo lo yra xpén Ne, chen gakanan men yra ne che wyob gak. Wxaal Ne te xangel Ne, chen yluu xangel No lo Xwa ne nak xpén Ne ne rlaa xdxiiin Ne. **2** Laa men wzëët ne nli xdiiz Dëdyuzh no le xkwent Jesucrist no le yrandxee ne wii men.

**3** Nzoon mén ne gool gyiich-ree, no nzoon mén ne gon yra ne gyed gak ne zëéd lo gyiich-ree no ne tsukas men ylaa men ne zëéd lo we porke che wyob ydxiiin tyemp ne gako.

## Gyiich ne wkaa Xwa por mén ne rlaleedx Jesucrist

**4** Noo nak Xwa, por laa de yra de ne nak de men ne rlaleedx Jesucrist zegne nuu de guedx gyëz ne nak Asia nak gyiichree ne kakaa noo. Dëdyuzh ne nak

Dëdyuzh axtegue chekwlo no ne nak ke Dëdyuzh naaree no ne chiid, laa Ne gaknonen de yra de no yseleedx Ne gyelendxi lo de yra Ne guedx espíritu ne zu nes lo yagzhil ne zob Ne rnebééy Ne, **5** no le yra Ne Jesucrist ne nak testig ne rkadedet no ne primerendxee wban ke lo yrandxee mengut no ne rnebééy lo yrandxee rrey ne nuu gyëzlyu. Ryaan Jesucrist be, wgyitxee Ne xdol be kon xren Ne, **6** wlaa Ne be men ne rnebééy, wlaa Ne be fxuz chen ylaa be xdxiiin Dëdyuzh Xuz Ne. Ryal Ne ne saknzoon be Ne, laa Ne ryal ynebééy ydeblo siguelendxee. Zengaw.

**7** Gukwii gante, schiid Ne lad bëw; yrandxee mén kwii Ne, axtegue mén ne wbib lans<sup>a</sup> led Ne kwii Ne, no yrandxee mén ne nuu ydendxee gyëzlyu baanske goon men chene kwii men Ne. Nli we, zenga gako.

---

<sup>a</sup>1:7 *Lans nak tebla yag ne nluts punt.*

8 “Noo nak zegnak leter A ne rzelo yrandxee leter, noo ke nak zegnak leter Z ne ryal yrandxee leter”, re Dëdyuzh, Dëdyuzh ne nak Dëdyuzh axtegue chekwlo no ne nak ke Dëdyuzh naaree no ne chiid no kesentyent rap Ne poder.

**Wlalo Jesucrist lo Xwa**

9 Noo nak Xwa ne rlaleedx Jesucrist zegne rlaleedx ke de Jesucrist no ne kayak sufrir zegne kayak ke de sufrir no ne kalaa ne rkyeen Dëdyuzh zegne kalaa ke do no ne rap pasens zegne rap ke de pasens ne rseleedx Jesucrist lo be. Lo lyu ne la Patmos ne ka lo nisdoo nunyoow noo por ne rzëët noo xdiiz Dëdyuzh no por ne rzëët noo xkwent Jesucrist. 10 Te dxtetmiink kesentyent waknonen Espíritu Sant noo, won noo wlen te rëz ne kesentyent fwert nes zhich noo zegnak chene rbëz trompet, 11 na rëz guin lo noo:

—Gukagyiich yra neree ne rwii de, lex guxaalo guedx gyëz ne nak Asia chen ydxiino lo yra men ne rlaleedx Jesucrist: lo men-Efeso, lo men-Esmirna, lo men-Pérgamo, lo men-Tiatira, lo men-Sardis, lo men-Filadelfia, no le lo men-Laodicea.

12 Lex wcheree lo noo chen kwii noo gan txu xrëz rnii lo noo, orguin wii noo guedx kantler-or. 13 Gwrooltee lad

kantler guin wii noo te mén ne rzaglo mengyëzlyu; nak men te lër ne rdxiin axtegue yennii men, no nuu te sinturon-or laz men. 14 Gyitsxtoo men ngyichdoo we zegnak zhiil axtegue yeetxo; le bzalo men rnaa zeg rnaa bël ne rlen lo gyi; 15 le nii men rkabnii zeg rkabnii brons ne wruu lo gyi; le xrëz men nak zegnak ledne rube gyowroo. 16 Nyabëë men nzen men guedx mël ne ndxiib gyeybaa; le ruu men rlen te spad ne nluts punt no ne ndux ydixyda; le txegwlo men rkabtsa zegnak chene kesentyent rgyiichyaa ngbiz.

17 Chene wii noo men, wyab noo nes lo men zegnak men ne che wet; per wxob nyabëë men xtoo noo, na men lo noo:

—Ydxedet de. Noo nak men primer, noo ke nak men lultim. 18 Noo mbán noo; wet noo, per orree mbán noo; nunk guetetre noo. Noo nzen gyiblew ne ryal rzëëtee ledne nuu mengut no le gyiblew linfyeren. 19 Gukagyiich yra neree ne che wii de, gukagyiich yra ne rak naaree no le yra ne gyed gak. 20 Yra guedx mël ne ndxiib gyeybaa ne wii de nzen noo nyabëë noo no le yra guedx kantler-or, zeree rna we: yra guedx mël rna guedx men ne rnebëéy lo yra xpén noo ne nuu guedx gyëz, le guedx kantler-or rna

yra xpén noo ne nuu yra guedx gyëz guin.

**Diiz ne wzëët Jesucrist  
por men-Efeso ne  
rlaleedx Ne**

**2** 1 'Gukagyiich yra ne yna noo lo de, lex gusaalo lo men ne rnebëéy lo yra xpén noo ne nuu gyëz-Efeso, gague: "Zeree na men ne nzen guedx mël ne ndxiib gyeybaa kon nyabëë men no ne za zëed lad guedx kantler-or: **2** Noo nan noo yrandxee ne rlaa de yra de, no nan noo pezee rak de sufrir lo dxiin, nan noo ne rtxuugdet lextoo de, nan noo ne rlaandet de kwii de menmal lad de, no nan ke noo ne wlaa de preb yra men ne re poxter nak men no nlideto, che wyenen de ne noze rkade men. **3** Kesentyent rap de pasens, run de wantar rak de sufrir por ne nak de xpén noo, no rsuudet lextoo de. **4** Per nuu te ne rtseleedxdet noo ne rlaa de: ne ryanelsaadetre de zegne ryanelsa de chene wzelo de. **5** Por neguin gunileedx gan pagox wzhiin de, lex gusaano; gulaa ke zegne rlaa de chene wzelo de; per belne ysaandet do, schiidgue noo ygyitxee noo xkantler de xlugaro. **6** Per nuu te ne wen ne rlaa de: ne rwi-nyaan de ne rlaa men ne nak nicolaíta, no ke noo rwinyaano. **7** Men ne rkagyedyag diiz, gon

men ne rzëët Espíritu Sant lo yra xpén noo: Log mén ne gun gan ne ylaadetre dol, noo ydee nex gu men, nex ne rkaa lo yag ne rguu gyelembán ne zob ledne nuu Dëdyuzh."

**Diiz ne wzëët Jesucrist  
por men-Esmirna  
ne rlaleedx Ne**

**8** 'No gukagyiich yra ne yna noo lo de, lex gusaalo lo men ne rnebëéy lo yra xpén noo ne nuu gyëz-Esmirna, gague: "Zeree na men ne nak men primer no ne nak ke men lultim, men ne wet no ne wban ke: **9** Noo nan noo yrandxee ne rlaa de, no nan noo pezee rak de sufrir, nan noo pezee rzak de gyelzi, per rik de por ne nak de xpén Dëdyuzh, no nan ke noo pezee rnii mén diznyaan por laa de; yra mén guin re men ne xpén Dëdyuzh nak men, per nlideto, sinke xpén Bzelo nak men. **10** Ydxdet de yra ne gak de sufrir. Porke ynague noo lo de ne zun Bzelo gan ysee mén txup tson xkompanyer de chegyiib chen gyen gan pe nli xpén Dëdyuzh nak de yra de, chii gbiz gak de sufrir. Per ysalzaandet de ne rlaleedx de noo axtegue ne le de guet, lex noo yseleedx gyelembán ne nunk luzhdet lo de. **11** Men ne rka-gyedyag diiz, gon men ne rzëët Espíritu Sant lo yra xpén noo: Log mén ne gun gan ne ylaadetre

dol, betre gakdetre men sufrir chene yrup tir ne guet mén.”

**Diiz ne wzëët Jesucrist  
por men-Pérgamo  
ne rlaleedx Ne**

**12** 'Gukagyiich yra ne yna noo lo de, lex guxaalo lo men ne rnebééy lo yra xpén noo ne nuu gyëz-Pérgamo, gugue: “Zeree na men ne rap spad ne nluts punt no ne ndux ydixyda: **13** Noo nan noo yrandxee ne rlaa de, no nan noo ne ledne rnebééy Bzelo nuu de, per mase zenga, rsalzaandet de nak de xpén noo no rsalzaandet de ne rlaleedx de noo; ni chene wket mén Antipas lad de yra de wa ledne nuu Bzelo, wsalzaandet de, Antipas ne wak xtestig noo no ne syemper wzëët xkwent noo. **14** Per nuu txup tson ne rtseleedxdet noo ne rlaa de: wa lad de wa nuu txup tson mén ne rlaandet ysalzaan ne wneluu Balaam ne wdee diiz lo Balac ne wsegjee Balac lextoo men-Israel wye men-Israel dol ru men-Israel ne wseleedx mén lo mdoo no rkanogue men xkompanyer men chene gardet ytsëlnya men. **15** No wa lad de wa nuu ke txup tson mén ne rlaandet ysalzaan ne wneluu men ne nak nicolaíta; rwinyaan noo kos guin. **16** Por neguin gyyenen gan kox rlaa de, porke belne laa de ne gyenden do, schiidgue noo wa

tilno noo men kon spad ne rlen ruu noo. **17** Men ne rkagyedyag diiz, gon men ne rzëët Espíritu Sant lo yra xpén noo: Log mén ne gun gan ne ylaadetre dol, noo ydee maná ne nulaan gu men no ydee noo te gyewin ne ngyich lo men; lo gyewin guin ka te la kweb men ne rutlel nandet, sinke nonchee laa men gakanano porke laa men ykakwento.”

**Diiz ne wzëët Jesucrist  
por men-Tiatira  
ne rlaleedx Ne**

**18** 'Gukagyiich yra ne yna noo lo de, lex guxaalo lo men ne rnebééy lo yra xpén noo ne nuu gyëz-Tiatira, gugue: “Laa XPee Dëdyuzh, men ne rnaa bzalo zeg rnaa bël ne rlen lo gyi no ne nak nii zegnak brons ne wruu lo gyi na: **19** Noo nan noo yrandxee ne rlaa de, no nan noo pezee ryannelsaa de, nan noo pezee rlaleedx de noo, nan noo pezee rlaa de xdxiiin noo, nan noo pezee rap de pasens, no nan noo ne ndaldee ne kalaa de naaree ke chene wzelo de. **20** Per nuu te ne rtseleedxdet noo ne rlaa de: run de wantar ne rlaa wnaa ne la Jezabel; rkanlo Jezabel profet nak Jezabel, per kon ne rzëët Jezabel rkade Jezabel yra xpén noo, rsegjee Jezabel lextoo men chen ykanogue men xkompanyer men chene gardet ytsëlnya men no chen

gu men ne che wseleedx mén lo mdoo. **21** Che wdee noo tyemp lo Jezabel chen ysaan Jezabel xgyelmal Jezabel, per rlaandet Jezabel ysaan Jezabelo: rsaan-det Jezabel ne rkano Jezabel mén ne nakdet lzaa Jezabel. **22** Por neguin noo ylaa ne yzhuun Jezabel gaalel men no ne kesentyent sakzi yra mgyeey ne che wtsëlnya ne ra rkano Jezabel belne ysaandet men logne rlaa men yra men Jezabel, **23** no yket noo yra zhiin Jezabel. Zenga gyenen yrandxee xpén noo ne rnebeey noo axtegue lenxgyeryen mén no rnebeey noo axtegue lenlextoo men; le lo de te te de yniiz noo ne ryal de segun ne wlaa de. **24** Per le lo de stebéd de ne nuu de Tiatira ne zanaldet de negwa ne rneluu Jezabel, ni nandet de pezee nak negwa ne rnii yra men gwa ne ngueedx ne nuu axtegue lenlextoo Bzelo, yna noo lo de ne betre ykyeendet noo de ylaa de. **25** Nunegue ne yna noo lo de nak ne ysalzaandet de xdiiz noo ne che nan de axtegue ne chiid noo. **26** Log mén ne gun gan ne ylaadetre dol no ylaa men ne rlaan noo gak ydeblo ne ybán men, noo ydee poder lo men ynebéey men yrandxee mengyëzlyu. **27** Zegne wniiz ke Xuz noo poder lo noo, zenga ke ydee noo poder lo men ynebéey men yrandxee

mengyëzlyu kon te bargyiib; ylaa men men zegne rlaa men ne rlabu gyusyu. **28** No ydee noo mël ne rlen gyeysaa lo men, mël ne rlen rsil. **29** Men ne rka-gyedyag diiz, gon men ne rzëët Espíritu Sant lo yra xpén noo.”

**Diiz ne wzëët Jesucrist  
por men-Sardis  
ne rlaaledx Ne**

**3** **1** 'Gukagyiich yra ne yna noo lo de, lex guxaalo lo men ne rnebéey lo yra xpén noo ne nuu gyëz-Sardis, gugue: “Zeree na men ne rap guedx xespíritu Dëdyuzh no ne nzen guedx mël ne ndxiib gyeysaa: Noo nan noo yrandxee ne rlaa de; mase za xdiiz de ne mbán de, per nak de zegnak mén ne che wet. **2** List gugak; guye gan pezee ylaa de chen ysalzaandet de ne wen ne che mer mer ysalzaan de; porke che wii noo ne yrandxee ne rlaa de, wendeto nes lo XDëdyuzh noo. **3** Gunileedx yra ne wseed de no ne won de, lex gulaa we; gusaan xgyelmal de. Porke belne laa de ne gaklistet de, schiid noo lo de zegnak chene rdxiiin te ngbaan, axtegue ni gyenden de chiid noo. **4** Per wa Sardis wa benak nuu txup tson mén lad de, men ne gardet ylabeed xab. Laa men guin nak ne saa yra noo ydebxabngyich men, porke ryal meno. **5** Log mén ne gun gan ne ylaadetre dol,

lérngyich gak men no yseyuudet noo la men lo liber ne ka la yrandxee mén ne rap gyelembán ne nunk luzhdet, no nes lo Xuz noo no le nes lo xangel me gue noo: Laa yra ménree nak xpén noo. **6** Men ne rkagyedyag diiz, gon men ne rzëët Espíritu Sant lo yra xpén noo.”

**Diiz ne wzëët Jesucrist  
por men-Filadelfia  
ne rlaleedx Ne**

**7** 'Gukagyiich yra ne yna noo lo de, lex guxaalo lo men ne rnebééy lo yra xpén noo ne nuu gyëz-Filadelfia, gugue: “Zeree na men ne bet dol neeydet no ne nli rnii, men ne nzen xgyiblew rrey-David, men ne chene yxalse yaglaa, ni te mén gundet gan ytsëë we, no chene ytsëëse men yaglaa, ni te mén gundet gan yxalo: **8** Noo nan noo yrandxee ne rlaa de. Wzu noo te yaglaa ne zemyal lo de ne ni te mén gundet gan ytsëë, porke mase yëten de poder, per rukas de xdiiz noo no rgyidxlaandet de ne xpén noo nak de. **9** Noo ylaa ne chiid yra xpén Bzelo suzhib men lo de. Mén guin re men ne xpén Dëdyuzh nak men, per nli deto, noze rkade men; ylaa noo zenga chen gakan men ne ryaan noo de. **10** Por ne rlaa de zegne rkyeen noo ne rap de pasens, por neguin noo gakanon de chene tsuu

gyelenles ne gak yrandxee mén preb ydendxee gyëzlyu. **11** Schiidgue noo. Ysalzaandet de xdiiz noo ne che nan de chen rut ygyitxeedet koron ne wun de gan. **12** Log mén ne gun gan ne ylaadetre dol, noo ylaa ne gak men zegnak te pilar lenxeydoo XDëdyuzh noo, no nunk yruudetre men nga, no ykaa noo la XDëdyuzh noo led men no le la xgyëz XDëdyuzh noo, laa we nga nak Jerusalén-kweb ne yruu xgyeybaa XDëdyuzh noo, no ykaa noo la noo ne kwebendxee led men. **13** Men ne rkagyedyag diiz, gon men ne rzëët Espíritu Sant lo yra xpén noo.”

**Diiz ne wzëët Jesucrist  
por men-Laodicea  
ne rlaleedx Ne**

**14** 'Gukagyiich yra ne yna noo lo de, lex guxaalo lo men ne rnebééy lo yra xpén noo ne nuu gyëz-Laodicea, gugue: “Zeree na Men ne nli rnii, men ne rkadedet, men ne syemper run kumplr xdiiz, men ne cheguel nuu chene wzhexkwaa Dëdyuzh gyëzlyu: **15** Noo nan noo yrandxee ne rlaa de, ne ni nyagdet de, ne ni nlaadet de. ¡Belnaal ne nyaknyag de o nyaknlaazeg de! **16** Per kom nonchee nyuul de, ni nyagdet de, ni nlaadet de, por neguin che nuu noo por ne koleedx noo de. **17** Re de ne rik de, yrandxoo rap de, bet rakdet

falt lo de; per no ryenden de ne baanske rzak de, nles rzak de, prob de, ngwlëë de, noze xgyerbëël de. **18** Por neguin yna noo lo de, guka or lo noo, or ne che wruu lo gyi no ne che wyan teblöse or, chen nli gakrik de; no guka lërngyich lo noo gak de, chen yruudet xgyelentu de; no guka rmed lo noo taa bzalo de chen gak kwii de. **19** Noo rakndux noo lo mén por ne ryaan noo men no rlxnëz noo men. Por neguin yna noo lo de, gulaa xdxii noo ydeblextoo de no gusaan xgyelmal de. **20** Gukwii gante, le noo zu ruyaglaa rkarëz noo. Belne nuu mén ron rkarëz noo no belne yxal men yaglaa, tee noo lenxyuu men, guxsëë noo yrup



*Le Jesus zu ruyaglaa*

noo men no guxsëë men yrup men noo. **21** Log mén ne gun gan ne ylaadetre dol, noo ydee si sob men yrup men noo ledne zob noo rnebëéy noo, zegnak noo, wun noo gan wlaadet noo dol, zhich guin wzob noo yrup noo Xuz noo ledne zob me rnebëéy me. **22** Men ne rka-gyedyag diiz, gon men ne rzëët Espíritu Sant lo yra xpén noo.”

### Yra ne wluu Dëdyuzh lo Xwa gyeeybaa

**4** 1 Wluzhse wak yra neree, wii noo zemyal te yaglaa gyeeybaa. Lex rëz ke ne won noo primer no ne nak zegnak chene rbëz trompet na lo noo:

—Gugyeep nee chen yluu noo lo de yra ne rap degne gak luzhse gak yra neree.

**2** Orgueguin waknonen Espíritu Sant noo, wii noo gyeeybaa zu te yagzhil ne kesentyent nzoon rnaa, lo yagzhil guin zob Dëdyuzh. **3** Rnaa Ne zegne rnaa te gye ne la jasje no gye ne la cornalina ne rkabtsa. No noze kbii yagzhil ne zob Ne zu te fkyiit ne rkabtsa zegne rkabtsa gye ne la esmeralda. **4** No wii noo zu sgalebtap yagzhil kbii yagzhil guin ne zob Ne; te te lo yagzhil guin zob tegue mengol; teblöse lërngyich nak men no tegue koron-or zob xtoo men. **5** Lo yagzhil guin ne zob Ne, reep nis, no ruu be, no ratsyaa

ngwzii; nes lo yagzhil guin zu guedx ne rasbël ne nak guedx xespîritu Ne. **6** No nga ke nes lo yagzhil guin nuu ne rnaa zeg rnaa nisdoo ne axtegue rnabider ne ndebnii.

Kbii yagzhil guin zob tap menmbán, noze yde led men zob bzalo men, nes lo nes zhichtee men. **7** Men primer rzaglo te meedx; le men ne wrup rzaglo te tor; le men ne wyon rtsoow lo men zegne rtsoow lo mén; le men ne rzaa men tap rzaglo te msii ne kazhobee. **8** Yra ydap menmbán guin xuup xpaan men zob, no noze yde ledo zob bzalo men, nes led nes leentoo zob bzalo men; no dxe gyëëltee rbézdnet ronii men, re men:

Sant, sant, sant nak  
 Dëdyuzh;  
 kesentyent rap Ne poder,  
 Dëdyuzh ne nak Dëd-  
 yuzh axtegue chekwlo  
 no ne nak ke Dëdyuzh  
 naaree no ne chiid.

**9** No te te chene rdee ydap menmbán guin dexkyizhtee lo Dëdyuzh ne mbán ydeblo siguelendxee no te te chene rzaknzoon rzaknontee men Ne, **10** rzuzhib yra galebtap mengol guin lo Ne, rzaknon men Ne ne mbán Ne ydeblo siguele-ndxee no rxob xkoron men nes lo yagzhil guin ne zob Ne, re men:

**11** Dëdyuzhe, laa de rnebëéy, ryal ne saknzoon mén de, ryal ne saknon mén de, ryal ne rap de poder, porke laa de nak ne wzhexkwaa yrandxee kos, porke laa de wlaan ne nuu we no ne waktsoowo.

**Gyiich ne zemzëë  
 kon guedx sey**

**5** **1** Wii noo nyabëë Dëdyuzh nzen Ne te gyiich ne ndeeb, nes lo nes zhichtoo ka leter, kon guedx sey zemzëë we. **2** No wii noo te angel ne kesentyent fwert, ndîpse wnabdiiz ne, re ne:

—¿Txuzh nak ne ryal yxal gyiichree no ne yxal sey ne zemzëë we?

**3** Per ni gyeeybaa, ni gyëzlyu, ni lenlyu wzëldet mén ne ryal nxal gyiich guin ni ne nyool ne ka lo we. **4** Wzelo noo kesentyent woon noo, porke ni te mén ne ryal yxalo rzëldet ni ne nyool ne ka lo we. **5** Orguin na te mengol ne ndxin nga lo noo:

—Goondetre de, porke le Men ne nak meedx ne zëed xnëz Judá no ne zëed xnëz rrey-David che wun gan lo gyelgut chen yxal meno no laa men nak ne yxal yra guedx sey ne zemzëë we.



6 Lex ledne zu yagzhil guin ne zob Dëdyuzh no le lad ydap menmbán guin no le gwrooltee yra mengol guin, wii noo zuli te Mén ne nak zegnak mëkzhiil bëen bëenleg, noze rnaad led men nuu beey ne wket mén men. Guedx dxxit men zob no guedx bzalo men zob; yra guedx bzalo men nak guedx xespíritu Dëdyuzh ne wxaal Ne ydendxee gyëzlyu. 7 Wbig Men ne nak zegnak mëkzhiil bëen bëenleg, wnëëz men gyiich guin nyabëë Dëdyuzh. 8 Or ne wnëëz men gyiich guin, wzuzhib ydap menmbán guin no le yra galeb-tap mengol guin lo men. Tegue arpa nzen te te mengol guin no nzen men fsingyi-or ne rsu guux ne nzoon rree; guux guin nak xdiiz xpén Dëdyuzh chene rnab men lo Ne. 9 Lex rolbaan mengol guin te kantkweb, zeree za we:

Laa de nak ne ryal gob gyiich gwa no ne ryal yxal yra sey ne zemzëë we;

porke wket mén de, kon xren de wka de yralo-ndxee mén chen gak men xpén Dëdyuzh, nyaalzhe txu xnëztezhe zëed men, nyaalzhe pe diiztezhe rnii men, nyaalzhe txu méntezhe nak men, nyaalzhe pe naciontezhe ngab men.

10 Wlaa de men men ne rnebëéy, wlaa de men fxuz chen ylaa men xdxiin XDëdyuzh be, laa men ynebëéy gyëzlyu.

11 Orguin wii noo, lex won noo xrëz ndalyaa ndalduxtee angel kbiindxee yagzhil ne zob Dëdyuzh rnebëéy Ne no le kbii ydap menmbán guin no le kbii yra mengol guin; por millón rga yra angel guin; 12 kesentyent ndíp rnii ne, re ne:

Men ne nak zegnak mëkzhiil bëen bëenleg ne wdee si ne wket mén men, ryal ne rap men poder no le gyelenzaak no le gyelenyenii no le fwers, no le gyelnon no le gyele-nzoon, no ryal men ne saknon be men.

13 No won noo xrëz yrandxee ne wzhexkwaa Dëdyuzh, nigle ne nuu gyeybaa, nigle ne nuu gyëzlyu, nigle ne nuu lenlyu, nigle ne nuu lo nisdoo, re we:

¡Por Dëdyuzh no le por Men ne nak zegnak mëkzhiil bëen bëenleg nak gyelnon, gyelenzoon, poder, ryal Ne saknon be Ne ydeblo siguelendxee!

14 Rke ydap menmbán guin, re men:

—¡Zengaw!

Le yra galeb-tap mengol guin wzuzhib wzaknon men

Dëdyuzh; laa Ne mbán ydeblo siguelendxee.

**Yra guedx sey**

**6** 1 Wluzh nga wii noo wxal Men ne nak zegnak mëkzhiil bëen bëenleg primer sey ne zemzëë gyiich guin delo yra we guedxo, lex won noo re te delo ydap menmbán guin:

—¡Gutaa!

Nak xrëz men zegnak chene ratsyaa ngwzii. **2** Orguin wii noo te kabay ngyich; te baz nzen men ne mbib maa no wka kwent men te koron; lex wruu men wa men wkuudx men mén no skuudxre men mén.

**3** Chene wxal Men ne nak zegnak mëkzhiil bëen bëenleg sey ne wrup, won noo re menmbán ne wrup:


—¡Gutaa!

**4** Orguin wruu te kabay nloo; lex wkwent men ne mbib ma poder chen ylaa men ne tsuu dil gyëzlyu no chen ylaa men ne yketelsaa mén, no wkwent men te spadnzho.

**5** Chene wxal Men ne nak zegnak mëkzhiil bëen bëenleg sey ne wyon, won noo re menmbán ne wyon:

—¡Gutaa!

Lex wii noo te kabay ngas; te zhigliber nzen men ne mbib maa. **6** Lex won noo wlen te rëz gwrooltee lad yra ydap menmbán guin, re we:



*Zhigliber*

—Teb kilegue zhoxtil non ne run te mos gan te dxë no tson kilegue cebada non ne run te mos gan te dxë; per yxiindet de seyt ni bin.

**7** Chene wxal Men ne nak zegnak mëkzhiil bëen bëenleg sey ne wzaa sey tap, won noo re men ne wzaa menmbán guin tap:

—¡Gutaa!

**8** Lex wii noo te kabay nguech; Gyelgut la men ne mbib maa; zhich ma zanal men ne la Ledne Nu Mengut. Wkwent men poder yrup men chen yket men tebtap lal ne nak mén ne nuu gyëzlyu kon lo dil, kon gbiin, kon gyelgyiz, no le kon maa ne ndux ne nuu gyëzlyu.

**9** Chene wxal Men ne nak zegnak mëkzhiil bëen bëenleg sey ne wzaa sey gaay, wii noo zhiin fkuuk ndxin yra xanem mén ne wet por ne wzëët men

xdiiz Dëdyuzh no le por ne wzëët men xkwent Jesucrist. **10** Kesentyent ndíp rnii yra mén guin, re men:

—Dëdyuzh, bet dol neeydet de no nli rnii de. ¿Pa axtegue or nak ne ylaa de gyelextis ne yzakzi de yra mén ne nuu gyézlyu ne wket men noo?

**11** Orguin wdee Ne lërngyich wak yra men guin, no re Ne lo men ne yneles men axtegue ne yzaa yra xkompanyer men guet zegne wet ke men yra men por ne rlaa men xdxiiin Jesucrist.

**12** Chene wxal Men ne nak zegnak mëkzhiil bëen bëenleg sey ne wzaa sey xuup, kesentyent wni lyu. Waknkeb lo ngbiz, wnaa ngbiz zeg rnaa lërngas, le mëëw wnaa zeg rnaa ren.

**13** Le yra mël ne ndxiib gyeybaa watxee gyézlyu zegne ratxee igyaa lo yag-ig chene kesentyent rlen mee ne rlaa mee we zere zerotee. **14** Wnitlo gyeybaa zegnak gyiich ne rdeeb; yrandxee gyey no le yra lyu ne ka lo nisdoo wzaa xlugaro. **15** Yra mén ne nak rrey gyézlyu, yra mén ne non, yra soldad ne rnebééy, yra mén ne rik, yra mén ne rap poder no yrandxee mén ne che wdoo no le yra mén ne ka liber wgyidxlaan lenbluu no le lad gye ne nuu gyey; **16** re men lo gyey no le lo gye:

—Gugyab led noo, gugyixlaan noo lo Dëdyuzh no le lo Men

ne nak zegnak mëkzhiil bëen bëenleg chen yzakzidet men noo.

**17** Porke le dxe ne ndxeeb ne sakzi mén che wdxiiin; ¿txuzh gun gan gun wantaro?

**Yra tebgwyuuno-  
txuplalno-tapmil  
men-Israel ne  
ka sey xudx**

**7** **1** Chene wluzh wak yra neree, wii noo zu tap angel ydap lad gyézlyu, rsoow ne lo mee ne rlen ydap lad gyézlyu chen ybiidet mee gyézlyu, ni lo nisdoo, ni lo yag. **2** No wii noo ste angel ne zëed nes ledne rlen ngbiz, nzen ne xsey Dëdyuzh-mbán. Ndípse wnii angel guin lo ydap angel ne wkakwent poder chen ylaa ne gyii gyézlyu no le lo nisdoo, re ne:

**3** —Ylaadetgue de gyii gyézlyu, ni nisdoo, ni yag axtegue ne ykaa noo sey xudx yra xpén XDëdyuzh be.

**4** No won noo gan palal nak mén ne wkaa sey xudx: tebgwyuuno-txuplalno-tapmil nak men yra men zegne zëed men xnëz Israel. **5** Chibtxupmil men ne zëed xnëz Judá nak ne wkaa sey xudx, chibtxupmil men ne zëed xnëz Rubén, chibtxupmil men ne zëed xnëz Gad, **6** chibtxupmil men ne zëed xnëz Aser, chibtxupmil men ne zëed xnëz Neftalí, chibtxupmil men ne zëed xnëz Manasés,

7 chibtxupmil men ne zëed xnëz Simeon, chibtxupmil men ne zëed xnëz Leví, chibtxupmil men ne zëed xnëz Isacar, 8 chibtxupmil men ne zëed xnëz Zabulón, chibtxupmil men ne zëed xnëz Xeb, chibtxupmil men ne zëed xnëz Benjamin.

**Yra menroo menduxtee ne nak lërngyich**

9 Wluzhse wak yra neree, wii noo ndalyaa ndalduxtee mén ne nuu yrandxee nacion, yralondxee klas mén, men ne rnii wren wren diiz, men ne nuu yrandxee gyëz. Kesentyent ndalyaa ndalduxtee men axtegue ni rut rundet gan ylab men. Yrandxee men zenga ndxinzuli nes lo yagzhil ne zob Dëdyuzh no le nes lo Men ne nak zegnak mëkzhiil bëen bëenleg. Teblöse lërngyich nak men no nzen men zin. 10 Noze nesree nesrotee rlen xrëz men yra men, re men:

Laa XDëdyuzh be ne zob lo yagzhil rnebëéy nak ne wselaa be lo dol yrup Ne Men ne nak zegnak mëkzhiil bëen bëenleg.

11 Le yrandxee angel ndxinzuli kbii yagzhil guin no le kbii yra mengol guin ne ndxin nga no le kbii ydap menmbán guin, lex wzuzhib ne ledne zu yagzhil axtegue wtee lo ne lyu, wzaknon ne Dëdyuzh, 12 re ne:

¡Zengaw! Lo Dëdyuzh nak ne ryal ydee mén dexkyizhtee no ynii mén dizwen,

Dëdyuzh nak ne ryal gyelenzoon, gyeleyenii, gyelnon, no le poder, no le fwers ydeblo siguelendxee.

¡Zengaw!

13 Orguin wnableiz te mengol guin lo noo, na men:

—¿Txu nak yra men gwa ne nak lërngyich no pazh wruu men ne ndxin men nee?

14 Wke noo, re noo lo men:

—Dechey, laa de nak ne nano. Lex na men lo noo:

—Laa yra men gwa nak ne kesentyent wii gyelenles; wlangyichdoo men xab men por ne waa meno lo xren Men ne nak zegnak mëkzhiil bëen bëenleg.

15 Por neguin ndxin men nes lo xyagzhil Dëdyuzh ne zob Ne rnebëéy Ne, dxe gyëeltee rlaa men dxiin lenxeydoo Ne; laa Ne nak ne gaknonen men yra men. 16 Che ylaandendetre men, ni ylaandetre men nis, ni zyeedydetre ngbiz led men, ni sakneedydendetre men, 17 porke laa Men ne nak zegnak mëkzhiil bëen bëenleg ne zu nes lo yagzhil ne zob Dëdyuzh gapkwent men yra men zegnak men ne rapkwent mëkzhiil no tsano men men rubzin ne rlen nis ne rguu gyelembán, no laa

Dëdyuzh nak ne ykwiidx nis lo men chen nunk goondetre men.

### Ne wzaa sey guedx

**8** 1 Chene wxal Men ne nak zegnak mëkzhiil bëen bëenleg sey ne wzaa sey guedx ne zemzëë gyiich guin, nonchee chi wak gyeeybaa zeg gwrool or. **2** Orguin wii noo yra guedx angel ne zuli nes lo Dëdyuzh; wkakwent ne tegue trompet. **3** Zhich guin wdxiiin ste angel, wzuli ne nes lo fkuuk-or, nzen ne te fsingyi-or no wnëëz ne ndalyaa ne nak zegnak yaal chen guu ne guux ne nzoon rree lo fkuuk guin ne nak nes lo yagzhil ne zob Dëdyuzh, chen ydxiino lo Ne tese yra we diiz ne rnii xpén Ne chene rnab men lo Ne. **4** Orguin wlen guux lenfsingyi guin ne nzen angel, wyeepeo nes lo Dëdyuzh tese yra we diiz ne rnii yra xpén Dëdyuzh chene rnab men lo Ne. **5** Zhich guin wsezaa angel guin fsingyi kon gyi ne nuu lo fkuuk, lex wtxoon no gyëzlyu; orguin watsyaa ngwzii, wuu be, weep nis, wni lyu.

### Wbëz trompet

**6** Lex wbinxnëz yra guedx angel ne nzen trompet chen kwëz no.

**7** Or ne wbëz angel ne primer xtrompet ne, wyab gyogye gyëzlyu no wyab gyi ne noots

ren; lex weekly tebtson lal ne nak gyëzlyu yra we tebtson lal yag no weekly ke yra gyizhyaa.

**8** Or ne wbëz angel ne wrup xtrompet ne, wyab zegnak te gyeynzhoon ne rasbël lo nisdoo; lex wak tebtson lal ne nak nisdoo ren, **9** no wet tebtson lal maa ne nuu lo nisdoo, no wluzhlo tebtson lal bark.

**10** Or ne wbëz angel ne wyon xtrompet ne, watxee te mëlnzhoo ne zob gyeeybaa, noze rasbël mël guin zegnak gyerbël; wyab mël guin lo tebtson lal ne nak gyoow no le lo tebtson lal ne nak bzin. **11** Nla la mël guin; lex waknla tebtson lal ne nak nis; ndal mén wet por ne waknla nis.

**12** Or ne wbëz angel ne wzaa angel tap xtrompet ne, wzeniidetre tebtson lal ne nak ngbiz, no wzeniidetre tebtson lal ne nak mëëw, no wzeniidetre tebtson lal ne nak mël ne ndxiib gyeeybaa; wyan nkeb tebtson lal ne nak ngbiz, ne nak mëëw, ne nak mël; wyeniidetre tebtson lal ne nak yedxe ni tebtson lal ne nak gyëël.

**13** Orguin wii noo kazhobee zegnak te msii gwrooltee gyeeybaa no won noo ndïpse re maa:

—¡Prob yra mén ne nuu gyëzlyu, prob men, probendxee men chene kwëz stson angel ne che nuu ne kwëz trompet ne rak falt kwëz!

**9** 1 Or ne wbëz angel ne wzaa angel gaay xtrompet ne, wii noo te mël ne watxee gyeybaa wyab mël guin gyëzlyu; lex wkakwent mël guin gyiblew ne nzëë pos ne kesentyent gyët. **2** Wxal mël guin pos guin, nga wlen guux zegnak chene rlen guux te ruyo ne kesentyent nzho; wlankeb guux guin lo ngbiz no le lo mee. **3** Nga lo guux guin wlen michzu, lex wzhobee ma ydendxee gyëzlyu, no wkakwent ma poder chen ydexkuts ma zegne rdexkuts mëkuu ne nuu gyëzlyuree. **4** No wakzëët lo ma ne bet ylaadet ma gyizh ne nuu gyëzlyu, ni ste klas gyizhyaa, ni yag, sinke nonchee mén ne neeydet xsey Dëdyuzh xudx yzakzi maa. **5** No wakzëët ke lo ma ne yketet ma mén, sinke noze yzakzi ma men gaay mëëw, sebyoob led men ledne ydexkuts ma zegne rzeb-yoob ledne rdexkuts mëkuu. **6** Cheguin ye mén gan pëzee guet men, per tsëldeto; ylaan men guet men, per guetet men. **7** Yra michzu guin rzaglo ma kabay ne che list nak por ne tsa lo dil; xtoo ma zob zegnak te koron-or, le txegwlo ma rnaa zeg rnaa txegwlo mén. **8** Gyitsxtoo ma rnaa zeg rnaa gyitsxtoo wnaa, le leey ma rnaa zeg rnaa leey meedx. **9** Laz ma nzëë teblo ne rnaa zeg rnaa gyiib, le xpaan ma rzheedx zeg

rzheedx chene rzhoon ndalyaa kabay ne zëdngob karret ne za lo dil. **10** Nak xgoz yra maa guin zegnak xgoz mëkuu, lo xgoz ma zob xguts maa; kon laa we yzakzi ma mén gaay mëëw. **11** No rap yra michzu guin te angel ne rnebëéy lo maa; laa angel guin nak ne rap-kwent pos guin ne kesentyent gyët; kon diz-hebreo la angel guin Abadón, le diz-griego la ne Apolión, diizree rna bzhiw.

**12** Wdesu primer gyelerdxeeb, per gyed zëëdo stxupo.

**13** Or ne wbëz angel ne wzaa angel xuup xtrompet ne, won noo te rëz ne wlen lad ydap skin fkuuk-or ne zu nes lo Dëdyuzh. **14** Re rëz guin lo angel ne wzaa angel xuup ne nzen trompet:

—Guselaa ydap angel ne kaduu rugyowroo ne la Eufrates.

**15** Zenga wláá ydap angel guin ne che list nak por or guin, por dxe guin, por mëëw guin, por iz guin, chen yket angel guin tebtson lal ne nak mén. **16** No won noo ne txupgwyuu-millón rga yra soldad ne mbib kabay.

**17** Zeree nak yra kabay ne wlalo lo noo; yra mén ne mbib maa nzëë laz men kon gyib-nloo, gyibsul, no le gyibnguech. Le xtoo yra kabay guin nak zegnak xtoo meedx, le gyedruu ma rlen bël no le guux no le azufre. **18** Wet tebtson lal mén

por gyon neguin ne rlen ruu kabay guin: bël no le guux no le azufre. **19** Kon ruu kabay guin rlaa ma gyii no le kon xgoz maa, porke rzaglo xgoz ma mëel, le lo xgoz ma rzaglo xtoo mëel, kon laa we rlaa ma gyii.

**20** Per yra mén ne wrukaa ne wetet chene wlaa maa guin gyii, wsalzaandet men ne rlaa men ne mal, ni wsalzaandet men ne rzaknon men menzab, ni wsalzaandet men ne rzaknon men mdoo ne nak or, ne nak plat, ne nak brons, ne nak gye, ne nak yag, ne rundet gan kwii, ni bet rondet, ni rzaadet. **21** Ni wsalzaandet men ne rketelsaa men, ni ne rlaa men gyelebruj, ni ne rkanogue men xkompanyer men chene gardet ytsëlnya men, ni wsalzaandet men gyelegbaan.

### Angel ne nzen gyiiich

**10** **1** Zhich guin wii noo ste angel ne kesentyent fwert, wruu ne gyeybaa zëdtseeb ne, nrël ne bëw no zu te fkyiit xtoo ne no rkabtsa lo ne zegnak lo ngbiz, le yrup kuur ne nak zegnak ledne rgaa bël. **2** Nzen ne te gyiiich ne zemyal lo; lex wzu nibëë ne lo nisdoo, le nibëg ne wzu ne lyu. **3** Lex wobtsaa ne ndïpse zegnak chene robtsaa te meedx; or ne wobtsaa ne, wlen xrëz guedx ngwzii. **4** Chene wluzh wnii guedx ngwzii, za noo nkagyiich

noo ne wzëët ngwzii, per won noo wlen te rëz gyeybaa, na we lo noo:

—Gukeedx negwa ne wzëët yra guedx ngwzii, ykagyiich-det do.

**5** Angel ne wii noo zu nii lo nisdoo no le lyu, wlisgya nyabëë ne nes gyeybaa. **6** Wgon ne Dëdyuzh ne mbán ydeblo siguelendxee. Laa Dëdyuzh wzhexkwaa gyeybaa gyëzlyutee no le nisdoo no le yrandxee ne nuu lo we, re angel guin:

—Che xchedetre gako; **7** porke chene ydxiin dxe ne kwëz angel ne yzaa angel guedx xtrompet ne, laa ne gak kumplir yra ne che wlebleedx Dëdyuzh nga zegne wzëët No lo yra mén ne wak profet ne wlaa xdxiin Ne. Yra neree waknandetgue méno chekwlo.

**8** Rëz ne won noo ne wlen gyeybaa, wnii we lo noo ste, na we:

—Gutsa gunëëz gyiiich ne zemyal lo ne nzen angel gwa ne zu nii lo nisdoo no le lyu.

**9** Orguin wa noo lo angel guin, re noo ne yniiz ne gyiiich guin lo noo; lex na ne lo noo:

—Le we nee, gugu we. Lenruu de gahnexo zegnak dxin, per le lenlextoo de gankla we.

**10** Lex wnëëz noo gyiiich guin nya angel guin, wu noo we; lenruu noo wahnexo zegnak dxin, per chene wluzh wu noo

we, waknla we lenlextoo noo.

**11** Zhich guin na angel guin:

—Rap de degne yberree de yzëët ke de ne sak ndal gyëz, ne sak ndal nacion, ne sak ndal mén ne rnii wren wren diiz, no le ne sak rrey.

**11** **1** Orguin wkakwent noo te gobkyii ne nak zegnak te bëg ne rkyiinen mén chene rdiix men, no won noo te rëz ne na lo noo:

—Gusuli, gutsa ydiix de xeydoo Dëdyuzh no ydiix de lo fkuuk no ylab de gan blazh mén rzaknon Dëdyuzh lenydoo guin. **2** Per ydiixdet de lo leey ne nak ruydoo, porke che wkakwent men ne nakdet men-Israelo; laa men nak ne ynebééy lo men-Jerusalén txuplalno-txup mëëw. **3** Noo yxaal txup xpén noo ynii por noo temilno-txupgwyuunotsonalal gbiz; lër ne rak mén ne ruu gyelgut gak men yrup men.

**4** Laa men nak yrup yagolivo no le yrup kantler ne zu lo Dëdyuzh; laa Ne rnebééy ydendxee gyëzlyu. **5** Belne nuu mén rlaan yzakzi men, rnelen men gyi gyedruu men rluzh men yrandxee mén ne rwinyaan men. Zenga nak ne guet kwas kyertee mén ne rlaan yzakzi men. **6** Rap ménree poder yrup men ne ytsëë men gyeypaa chen gyabdete gyo ydeblo ne yzëët men diiz ne rguu Dëdyuzh lextoo men no rap ke men

poder por ne ylaa men ne gak nis ren no por ne ylaa men ne gak yralondxee gyelerdxeeb gyëzlyu laltee tir ne rlaan men gako. **7** Per chene gyal yzëët men xdiiz Dëdyuzh, yruu te mazab lenpos ne kesentyent gyët, til ma men, gun ma gan lo men, yket ma men. **8** Noze runëz ganzeeb xkwerp men lenlgyëzroo ledne wkaa Jesucrist lo kruz, ledne rnii ke mén Sodoma no le Egipto. **9** Tson gbizgwrol kwii mén gaa xkwerp yrup ménree nga; yrandxee gyëz, yralondxee klas mén, yrandxee mén ne rnii wren wren diiz, yrandxee nacion kwii we, no ydeedet yra mén guin si tsu-gyeer men. **10** No kesentyent yzhiilen yra mén ne nuu gyëzlyu ne guet yrup ménree, axtegue nuu te ne ygueed men lo xkompanyer men tant yzhiilen men, porke kesentyent wzakzi yrup ménree men. **11** Per chene wzaa tson gbizgwrol wneban ke Dëdyuzh men, waxee men ste; yrandxee mén ne wii ne waxee men, kesentyent wdxen men. **12** Zhich guin won men wlen te rëz ne kesentyent fwert axtegue gyeypaa, re we lo men yrup men:

—¡Gugyeep nee!

Lex wyeep men gyeypaa kon te bëw; yra mén ne nyaan rwii men wii ne le men syayeep. **13** Orke guin kesentyent wni



lyu, wzenyuu tebchii lal ne nak gyëz guin, wet guedxmil mén. Le yra mén ne wetet, kesentyent wdxe men, wzelo men wzaknon men Dëdyuzhnzoon.

**14** Wdesu ne wrup gyele-rdxeeb, per wyob gak ne gyono.

### Ne wzaa trompet guedx

**15** Or ne wbëz angel ne wzaa angel guedx xtrompet ne, kesentyent ndíp wlen ndal rëz gyeybaa, re we:

Yrandxee mén ne rnebëéy gyëzlyu, ynebëéydetre men;

laa Dëdyuzh nak ne ynebëéy yrup Ne XeCrist Ne;

laa Ne ynebëéy ydeblo siguelendxee.

**16** Orguin wzuzhib yra galeb-tap mengol ne zob lo yagzhil ne zu nes lo Dëdyuzh axtegue wtee lo men lyu, wzaknon men Dëdyuzh, **17** re men:

Dëdyuzhe, laa de rnebëéy, laa de nak ne kesentyent rap poder,

laa de nak Dëdyuzh axtegue chekwlo no laake de nak Dëdyuzh naaree no laake de nak ne chiid,

rniiz noo dexkyizhtee lo de, porke rbonyoo de ne

kesentyent rap de poder no le de che wzelo rnebëéy.

**18** Wlayaa yra mengyëzlyu lo de,

per che wdxiin dxe ne konyoo de ne no de rlayaa lo men

no che wdxiin dxe ne ylaa de gyelextis lo mengut

no ydee de ne ryal yra profet ne wlaa xdxiiin de

no le ne ryal yra mén ne nak xpén de no le ne ryal yra mén ne rzaknon de,

nigle men ne non, nigle men ne zhi non,

no sluzh de yra mén ne rluzh yra mén ne nuu gyëzlyu.

**19** Wluzh nga wyal xeydoo Dëdyuzh, ydoo ne zob gyey-baa; lenydoo guin nyoo zob te kajon ne nutsoow xley Dëdyuzh; orguin weep nis, wuu be, watsyaa ngwzii, wni lyu, no kesentyent wyab gyogye.

### Te wnaa yrup te dragón

**12** **1** Lex wuu te beey ne kesentyent nzoon gyey-baa: wlalo te wnaa ne nrël ngbiz, ngyichnii men mëëw, le xtoo men zob te koron ne neey chib-txup mël ne ndxiib gyeybaa.

**2** Nakzhiin wnaa guin, noze robtsaa men por tant gyelerzeb-yoob ne gal xpëéd men. **3** Zhich guin wuu ste beey gyeybaa:

wlalo te dragón nloo ne kesentyent nzho; guedx xtoo ma zob no le chii xdxit maa no tegue koron zob te te xtoo maa. **4** Kon xgoz ma wgobzengye ma tebtson lal mël ne ndxiib gyeybaa, wtxoon ma mël gyëzlyu. Lex wzutsë ma lo wnaa guin ne wal gal zhiin chen gugue ma zhiin men zegne gal ne. **5** Wap men te mëdbee ne ynebééy ydendxee gyëzlyu kon te bargyiib. Per wbetxee xpëdbee wnaa guin lo men wdxiin ne lo Dëdyuzh ledne zu yagzhil ne zob Dëdyuzh rnebééy Dëdyuzh. **6** Lex wzhoon wnaa guin wdxiin men denbidx ledne che wlaxnëz Dëdyuzh por laa men; nga tsël ne gu men temilno-txupgwyuunotsonlal gbiz.

**7** Zhich guin wuu dil gyeybaa: waken angel-Miguel yra ne xangel ne wdilno ne dragón yra dragón xangel dragón. **8** Per wundet ma gan lo yra angel guin, wakdetre nyuu ma gyeybaa, ni xangel maa wakdetre nyuu gyeybaa. **9** Zenga nak ne wruu dragón nzho guin gyeybaa, wyab ma gyëzlyu yra ma xangel maa. Laa maa guin nga nak mël axtegue chekwlal, laake ma nak menzab, laake ma nak Bzelo ne rkade yrandxee mén ne nuu ydendxee gyëzlyu.

**10** Lex won noo wlen te rëz gyeybaa, kesentyent fwert re we:

—Che wdxiin dxe ne yselaa Dëdyuzh xpën Ne, che wdxiin dxe ne gaknyoo xpoder XDëdyuzh be no gaknyoo ne rkyeen Ne no le ne rkyeen XeCrist Ne; porke che wnexoon Ne Bzelo ne ra dxe gyëeltee lo XDëdyuzh be ra gue men yra ne rlaa mén ne nak xpën Jesucrist. **11** Che wun xpën Ne gan wkuudx men Bzelo kon xren Men ne nak zegnak mëkzhiil bëen bëenleg no le kon yra xdiiz Dëdyuzh ne wzëët men lo mén, no wboleedx men xgyelembán men axtegue wet men. **12** Por neguin tsuu gyelgwzhiil gyeybaa; guzhiilen yra de zegne nuu de gyeybaa. ¡Per prob de yra de ne nak de men ne nuu gyëzlyu no le yra de ne nak de men ne nuu lo nisdoo, porke le Bzelo wlenza lad de wa! Kesentyent rlayaa Bzelo porke nan Bzelo ne zhindxee tyemp rak falt por Bzelo.

**13** Chene wyenen dragón guin ne le ma che wyab gyëzlyu, wrunal ma wnaa guin ne wap mëdbee guin. **14** Per wkakwent men txup xpaan msii ne kesentyent nzho, chen gun men gan xobee men gyab men denbidx ledne kesentyent nat lo maa guin; nga tsël ne gu men tson izgwrol. **15** Wnelen maa guin nis nes gyedruu maa zegnak te gyoow, chen loow wnaa guin. **16** Per wun gyëzlyu xyudar men, wrëz gyëzlyu woo we ybidx

nis guin ne wlen ruu maa guin. **17** Por neguin wlayaa ma lo wnaa guin, wa ma wdil ma yra mén ne zééd xnéz wnaa guin; laa yra mén guin nga rlaa ne rkyeen Dëdyuzh, zanal men xdiiz Jesucrist.

### Txup mazab

**13** **1** Wzu dragón guin runisdo; lex wii noo wyepgya te mazab lo nisdoo; guedx xtoo ma zob no zob chii xdxit maa; tegue koron zob te te xtoo xdxit maa, no te te xtoo maa ka diznyaan por Dëdyuzh. **2** Mazabree ne wii noo, rzaglo ma te tiquer, le nii ma nak zegnak nii os, le ruu ma nak zegnak ruu meedx. Lex wdee dragón xpoder dragón lo mazab guin no wdee dragón ledne rzob dragón rnebééy dragón no wdee dragón permis ne laa mazab guin kesentyent ynebééy. **3** Axtegue ndxeeb rnaa te xtoo maa guin, nako zegnak ledne wruug, che rnaadetre ne ybán maa, per wyakeno; por neguin kesentyent wzee wzak yrandxee mén ne nuu gyézlyu, wzelo men wanal men maa. **4** Wzaknon men dragón guin porke wdee ma poder lo mazab no wzaknon ke men mazab, re men:

—¿Txuzhleg nak zegnak maaree? ¿Txuzhleg nak ne gun gan tilno maa?

**5** No wkwakwent ma poder chen ynii ma dizdxin no ynii ma diznyaan por Dëdyuzh no chen ynebééy ma txuplalno-txup mëëw. **6** Lex wnii ma diznyaan por Dëdyuzh no wnii ma diznyaan por la Ne no le por gyeybaa ledne zob Ne no le por yra men ne nuu gyeybaa. **7** No wkwakwent ma poder chen til ma xpén Dëdyuzh axtegue ne gun ma gan lo men, no wkwakwent ma poder chen ynebééy ma lo yralondxee mén, no le lo yrandxee gyéz, no le lo yrandxee mén ne rnii wren wren diiz, no le lo yrandxee nacion. **8** Yrandxee mén ne nuu gyézlyu saknon mazab guin, yra mén guin axtegue ne waa gyézlyu kagyiichdet la men lo liber ne ka la yrandxee mén ne rap gyelembán ne nunk luzhdet; liberree xliber Men ne nak zegnak mëkzhiil bëen bëenleg ne wdee si wet nako.

**9** Men ne rkagyedyag diiz, gon men neree. **10** Mén ne che nunla ne tsuu chegyiib, chegyiib tsuu men; mén ne che nunla ne guet kon spad, kon spad guet men. Nee nak ne gyen gan pe nli ne rap yra xpén Dëdyuzh pasens no gan pe nli ne rlaleedx men Ne.

**11** Zhich guin wii noo ste mazab ne wruu lenlyu; txup xdxit ma zob, nak xdxit ma

zegnak xdxit mēkzhiil, per rnii ma zegne rnii dragón. **12** No rap ma yrandxee poder ne rap mazab ne primer no nes lo ma primer wnebééy maa, no wlaa ma ne wzaknon yrandxee mén ne nuu gyēzlyu ma primer ne wyaken xtoo no ne che rnaadetre ne ybán. **13** Mazab guin ne wruu lenlyu, wlaa ma ndal gyeilmilaguer ne nzoon, nes lo yrandxee mén wlaa ma ne wlen gyi gyeysbaa wyabo gyēzlyu. **14** Por yra gyeilmilaguer guin ne wlaa ma nes lo mazab ne primer, wkade ma yrandxee mén ne nuu gyēzlyu. Wkyeen ma wzhe-xkwaa men te xebneb mazab ne primer ne wetet mase waaz spad xtoo maa. **15** No wkwakwent mazab guin poder chen guu ma gyelembán lextoo xebneb mazab ne primer, chen ynii nbeb guin no chen ylaa we ne guet yrandxee mén ne wzaknondeto. **16** No wlaa mazab guin ne ykaa te beey nyabēē yrandxee mén o xudx men, nigle mennon, nigle men ne zhi non, nigle menrik, nigle menprob, nigle mén ne che wdoo, nigle mén ne ka liber. **17** No ni te mén gundet gan yka ni ytoo belne neeydet men xbeey maa guin. Laa beey guin nak la maa guin o nak xnumber la maa. **18** Nee rkyiin gyele-nyenii. Mén ne nyenii, sboo men kwent xnumber mazab guin; laa number guin nak xnumber

mengyēzlyu; laa we nga nak xuupgywuuno-tsonlalno-xuup.

**Wolbaan yra  
tebgwyuuno-txuplalno-  
tapmil mén**

**14** **1** Wluzh nga wii noo le Men ne nak zegnak mēkzhiil bēēn bēēnleg zuli xtoo gyeys-Sión yra men tebgwyuuno-txuplalno-tapmil mén ne ka la Men ne nak zegnak mēkzhiil bēēn bēēnleg xudx no le la Xuz men. **2** No won noo wlen te rēz gyeysbaa, nako zegnak ledne rube gyowroo no zegnak chene kesentyent ratsyaa ngwzii no zegnak chene rool ndal mén xarpa men. **3** Yra tebgwyuuno-txuplalno-tapmil mén guin, rolbaan men te kantkweb nes lo xyagzhil Dēdyuzh ne zob Ne rnebééy Ne no nes lo yra ydap menmbán no nes lo yra mengol ne zob nes lo Ne, no ni te mén rundet gan yseed kant guin, sinke nonchee yra tebgwyuuno-txuplalno-tapmil mén ne wláá delo lo yrandxee mén ne nuu gyēzlyu. **4** Laa yra ménree nak ne axtegue wkanodet wnaa, xnēz wbán men; laa men nak ne kanalel Men ne nak zegnak mēkzhiil bēēn bēēnleg ledne za ledne zutee men, laa men nak ne wláá delo lo yrandxee mén, laa men nak zegnak goon ne primerendxee por Dēdyuzh no por Men ne nak zegnak

mëkzhiil bëen bëenleg. **5** Axtegue nunk wkadedet men, bet dol neeydet men nes lo Dëdyuzh.

### Diiz ne wzëet tson angel

**6** Zhich guin wii noo ste angel ne kazhobee gwrooltee gyeybaa zaneey ne xdiznzoon Jesucrist, diiz ne nunk luzhdet, chen yzëet no lo yrandxee mén ne nuu gyëzlyu, no le lo yrandxee nacion, no le lo yralondxee klas mén, no le lo yrandxee men ne rnii wren wren diiz, no le lo yrandxee gyëz. **7** Kesentyent fwert re ne:

—Gusaknon Dëdyuzh porke laa Ne wzhexkwaa gyeybaa gyëzlyutee no le nisdoo no le bzin. Gudxe Ne no gusaknzoon Ne, porke che wdxii or ne ylaa Ne gyelextis lo mén.

**8** Orguin wii noo ste angel ne re:

—Che wluzh gyëzroo, che wluzh gyëzroo ne la Babilonia, porke laa mengyëz guin wlaa ne yrandxee mengyëzlyu wak zegnak men ne rzudxen, wlaa mengyëzlyu ne rlaan led men zegne wlaa ke mengyëz guin.

**9** Wluzh nga wii noo ste angel ne wzaa angel tson, kesentyent fwert re ne:

—Belne nuu mén saknon mazab gwa no belne saknon men xebneb mazab gwa no belne ydee men si ykaa xbeey

ma xudx men o nya men, **10** sakzi men, sboo xgyelnaa Dëdyuzh lo men; kesentyent yzakzi Ne men, baanske ylaa men lo gyirenni no le lo azufre nes lo xangel Ne no le nes lo Men ne nak zegnak mëkzhiil bëen bëenleg. **11** Nunk kwëzdet ylen guux ledne sakzi men, dxe gyëeltee sakzi men por ne rzaknon men mazab gwa yrup ma xebneb maa no por ne wdee men si wkaa xbeey ma xudx men o nya men. **12** Nee nak ne gyen pezee rap yra xpén Dëdyuzh pasens, men ne rlaa ne rkyeen Ne no ne nli rlaleedx Jesucrist.

**13** Zhich guin won noo wlen te rëz gyeybaa, na we lo noo:

—Gukagyiiich yra diizree ne yzëet noo: “Desde nedxeree, nzoon yra mén ne ret ne che rlaleedx men Jesucrist.” Nli we, re Espíritu Sant, sne men ylaadetre men dxiin, porke yra ne wen ne wlaa men, laa we nak ne rgunzoon lextoo men.

### Wdop logne wak lo lyu

**14** Zhich guin wii noo te bëwngyich. Lo bëw guin zob te mén ne rzaglo mengyëzlyu; zob te koron-or xtoo men no nzen men te gwchil ne kesentyent ndux lo. **15** Lex wruu ste angel lenydoo guin ne zob gyeybaa, kesentyent fwert re ne lo men ne zob lo bëw:

—Gukyiinen xegwchil de, gutxuug xebzun zhobxtil porke che wdxiiin tyemp ne txuugo, che walo.

**16** Orguin wxoon mén guin ne zob lo bëw xegwchil men ydendxee gyëzlyu, wtop men yra zhobxtil ne wak gyëzlyu.

**17** Zhich guin wruu ste angel lenydoo ne zob gyeybaa, nzen ne ste gwchil ne kesentyent ndux lo. **18** Lo fkuuk wruu ste angel ne rnebëéy lo gyi, kesentyent fwert re ne lo angel ne nzen gwchil ne kesentyent ndux lo:

—Guxoon xegwchil de ne ndux lo, gutxuug xemzhuun ub ne ka gyëzlyu, porke che walo.

**19** Lex wxoon xegwchil angel ydendxee gyëzlyu, wtxuug ne yra xemzhuun ub ne ka gyëzlyu, lex wsee no te ledne kesentyent nzhoo chen yzhii we; neree rna kastig ne kesentyent ndxeeb ne yxaal Dëdyuzh por mengyëzlyu. **20** Lex wzhii ub guin fwer lenlgyëz; ledne wzhii we wlen ren, wyasgya ren guin axtegue medid ruu kabay no zeg tsongwyuu kilometro wlaalo lo lyu.

**Guedx angel no le  
guedx gylentoz**

**15** **1** Gyeybaa wii noo ste beey ne kesentyent nzoon no ne axtegue rneese: wii noo guedx angel ne nzen

guedx gylentoz ne gak lultim, porke kon laa we nak ne koo yra xgyelnaa Dëdyuzh.

**2** No wii ke noo te ne rnaa zeg rnaa nisdoo ne axtegue rnabider nootso gyi; lo nisdoo guin zuli yra mén ne wun gan lo mazab no le lo xebneb mazab no ne wdeedet si nyeeey number ne nak la mazab; nzen men tegue arpa ne wdee Dëdyuzh lo men. **3** Rolbaan men ne wolbaan Moises ne wlaa xdxiiin Dëdyuzh no ne rolbaan Men ne nak zegnak mëkzhiil bëën bëënleg, re men:

Kesentyent non no nzoon yra ne rlaa de, laa de ne rnebëéy de, laa de ne nak de Dëdyuzh ne kesentyent rap poder,

xnëz no wen yra ne rlaa de,

laa de nak xerrey yrandxee mengyëzlyu.

**4** ¿Txuzh nak ne ydxedet de Dëdyuzhe,

no txuzh saknondet de?

Si tendxee de nak ne bet dol rlaadet,

schiid yrandxee mengyëzlyu saknon men de porke che wyenen men ne xnëz yrandxee ne rlaa de.

**5** Wluzh wak yra neree, wii noo wyal Ledne Kesentyent Nda lenydoo ne zob gyeybaa. **6** Nga

lenydoo guin wruu yra guedx angel guin ne nzen yra guedx gyelentoz; teblose lërlino ne ngyichdoo no ne rkabnii nak ne yra ne, no nuu tegue sinturon-or laz ne. **7** Lex wdee te delo ydap menmbán guin tegue bas-or lo ne te te ne, yzaa we kastig ne yxaal Dëdyuzh ne mbán ydeblo siguelendxee. **8** Wyezaa guux lenydoo guin por xgyelenzoon Dëdyuzh no le por xpodet Ne, axtegue rut rakdet tee nga axtegue ne tesu yra guedx gyelentoz ne nzen yra guedx angel guin.

**Guedx bas ne nuu guedx gyelentoz**

**16** **1** Zhich guin won noo wlen te rëz kesentyent fwert lenydoo guin, re we lo yra guedx angel guin:

—Gutsa lo gyëzlyu, gutsalaat yra guedx bas gwa ne nuu kastig ne yxaal Dëdyuzh tant rlaa Ne.

**2** Wa angel primer wlaat xbas ne gyëzlyu, yrandxee mén ne neey xbeey mazab guin no ne rzaknon xebneb ma wlen gyeez ne ndxeeb rnaa no ne kesentyent rzebyoob.

**3** Lex wlaat angel ne wrup angel xbas ne lo nisdoo, ybidxendxee nisdoo wak ren zegnaxren mengut, yrandxee maa ne nuu lo nisdoo wet.

**4** Wlaat angel ne wyon angel xbas ne lengyoow no le lo bzin, ybidxendxee nis wak

ren. **5** Orguin won noo re angel ne rnebéey nis:

—Laa de xnëz rlaa de gyelextis, laa de Sant de, laa de nak Dëdyuzh naaree, laake de nak Dëdyuzh axtegue chekwlo. **6** Laa yra mén gwa nak ne wket yra mén ne nak xpén de no laa men wket yra xprofet de; naaree naa rdee de ren roo men; wzëel meno.

**7** No won ke noo wlen te rëz lo fkuuk, re we:

—Nli we Dëdyuzhe, laa de kesentyent rap poder; wen no xnëz rlaa de gyelextis.

**8** Zhich guin wlaat angel ne wzaa angel tap xbas ne lo ngbiz, wkakwent ngbiz poder por ne yzeey ngbiz mén zegne rzeey gyi. **9** Yrandxee men weeky por tant wlaa lo ngbiz, per wsaandet men xgyelmal men, ni wzaknondet men Dëdyuzh, sinke lel wnii men diznyaan por Dëdyuzh por ne rap Ne poder rlaa Ne yra neree.

**10** Wlaat angel ne wzaa angel gaay xbas ne ledne zob mazab rnebéey mazab, noze waknkebyaas ydendxee ledne rnebéey mazab; baanske rlaa yra mén, axtegue rkaleey loz men por tant rak men sufrir. **11** Per ni zenga wsalzaandet men ne rlaa men ne mal, lel wnii men diznyaan por Dëdyuzhnzoon por tant rzebyoob gyeez ne ndxiib led men.

**12** Zhich guin wlaat angel ne wzaa angel xuup xbas ne lengyowroo ne la Eufates, lex wbidx nis gyoow guin chen gak tee yra rrey ne zëed nes ledne rlen ngbiz.

**13** Wii noo wlen tegue espí-ritu mal ne rnaa zeg rnaa ngwlaaz ruu dragón no le ruu mazab no le ruu profet ne noze rkade. **14** Xespíritu menzab nak gyon espíritu guin ne rlaa gye-milaguer no laa we ratop rrey ne nuu ydendxee gyézlyu chen tilno men Dëdyuzh chene ydxiin dxe ne ylaa Ne gyelextis.

**15** Laa Jesucrist re neree:

—Gukwii gante, schiid noo lo de zegnak chene rdxin te ngbaan. Per nzoon mén ne noze list zu no ne nak xab, chen sudet men noze bëel men koo xgyele-ntu men.

**16** Lex wtop espíritu guin yrandxee rrey, wdxin rrey ledne la Armagedón kon diz-hebreo.

**17** Zhich guin wlaat angel ne wzaa angel guedx xbas ne lo mee, lex wlen te rëz kesen-tyent fwert axtegue lenydoe ne zob gyeypaa ledne zu xyagzhil Dëdyuzh ne zob Ne rnebééy Ne, re rëz guin:

—Le we yra we che wak.

**18** Orguin weep nis, wuu be, watsyaa ngwzii, no kesentyent ndxeeb wni lyu, axtegue nunk gardet yni lyu zenga ydeblo ne

nuu mén gyézlyu. **19** Waktsonla gyézroo ne la Babilonia no watla yrandxee gyéz ne nak gyézlyu; wntleedxdet Dëdyuzh ne yzakzi Ne gyézroo guin por tant rlaa Ne. **20** No wntlo yrandxee lyu ne ka lo nisdoo no le yrandxee gyeey. **21** No wyab gyogye ne kesentyent nzhoo led mén, zeg txuplal kil na we. Lex wnii mén diznyaan por Dëdyuzh por ne wyab gyogye guin, porke kesen-tyent ndxeeb wak ne wyabo.

### Wnaa ne mbib mazab

**17** 1 Wdxiid te delo guedx angel ne nzen bas, na ne lo noo:

—Gutaa, yluu noo lo de pezee sakzi wnaa ne rkano wren wren mgyeey, wnaa ne zob lo nisnaal.

**2** Porke yra rrey ne nuu gyézlyu ra rkano wnaa guin, no yrandxee mén ne nuu gyézlyu wak zegnak men ne rzudxen, wlaa men ne rlaan led men yra men wnaa guin.

**3** Orguin waknonen Espíritu Sant noo, wano angel noo den-bidx; nga wii noo te wnaa ne mbib te mazab ne nloo; noze yde led ma ka diznyaan por Dëdyuzh, guedx xtoo ma zob no zob chii dxxit maa. **4** Lër ne nak wnaa guin morado no nloo we no kesentyent nzhexkwaa xab men kon ne or no kon gyezhaandxee no le kon perla, no nzen men te bas-or, yzaa



zyaandxoo ne mbixleedx no le yra ne nzaz ne rlaa men. **5** Xudx men ka diiz ne rutlel rdeedet kwent gan pe rna, zeree re we: “Babilonia, gyëzroo ne nak xnaa yra wnaa ne rkano wren wren mgyeey no ne nak xnaa yrandxee ne mbixleedx ne nuu gyëzlyu.” **6** Orguin wyenen noo ne kesentyent rzudxen wnaa guin kon xren xpén Dëdyuzh no le kon xren yra mén ne wet por ne wzëët men xdiiz Jesucrist. Chene wii noo wnaa guin kesentyent wzee wzak noo. **7** Lex na angel guin lo noo:

—¿Penak rzee rzak de? Orree yzëët noo lo de gan kox rna wnaa gwa no gan kox rna mazab gwa ne zob guedx xtoo no le chii xdxit. **8** Mazab ne wii de, te mazab ne wuu chekwlal nak maa, yëtetre ma naaree, per che wyob yruu ma lenpos ne kesentyent gyët, laa ne luzhlel ma nga. Yra mén ne nuu gyëzlyu, men ne desde ne waa gyëzlyu ne kagyiichdet la lo liber ne ka la yrandxee mén ne rap gyelembán ne nunk luzhdet, see sak men chene kwii men mazab ne wuu chekwlal no ne yëtetre naaree, per schiid ma ste.

**9** 'Nee rkyiin gyelenyenii: Yra guedx xtoo mazab guin rna guedx gyeey ne zob wnaa gwa xtoo **10** no rna ko yra guedx rrey. Gaay rrey guin che wluzh, te men nak ne rnebééy naaree,

le ste men gyed ynebééy; per chene ynebééy men guin ne gyed ynebééy, ydiidet men xche. **11** Mazab ne wuu chekwlal per naaree yëtetre maa, rna rrey ne wzaa rrey xun; te ke rrey ne nak rrey guedx nak maa guin, laa ne luzhlel ma nga.

**12** 'Yra chii xdxit maa guin ne wii de, rna yra chii rrey ne gardet ynebééy, per chene ynebééy men yra men mazab, tendxee or ynebééy men. **13** Yra chii rreyree, tebegue gak men yra men ydekwent men xpoder men lo mazab no le yra ne rnebééy men. **14** Tilno men Men ne nak zegnak mëkzhiil bëën bëënleg, per zun Men ne nak zegnak mëkzhiil bëën bëënleg gan lo men yra men, porke laa Men ne nak zegnak mëkzhiil bëën bëënleg nak ne rnebééy lo yrandxee men ne rnebééy, no laa men nak rrey lo yrandxee rrey; no yrandxee mén ne nak xpén men, laa Dëdyuzh wbëz men no laa Ne wye men no rsalzaandet men ne rlaleedx men Ne.

**15** No na angel guin lo noo:  
—Lo nisnaal ne wii de ne zob wnaa ne rkano wren wren mgyeey, nis guin rna yra gyëz, yra menroo menduxtee, yra men ne rnii wren wren diiz, no le yra nacion. **16** Mazab ne wii de yra ma chii xdxit maa kwi-nyaan ma wnaa guin ne rkano

wren wren mgyeey, ysan ma men nonchee zenga noze bëël men, lex gu ma bëël led men, no yzeey ma men lo gyi yra ma chii xdxit maa. **17** Laa Dëdyuzh wguu lextoo yra chii rrey guin ne ylaa men zegne rlaan Ne, tebegue gak men ydekwent men yra ne rnebéeý men lo mazab axtegue ne gak kumplir xdiiz Dëdyuzh. **18** Wnaa ne wii de, rna gyëzroo ne rnebéeý lo yrandxee rrey ne nuu gyëzlyu.

**Wluzh Babilonia**

**18** **1** Wluzh wak yra neree, wii noo ste angel, wruu ne gyeeybaa zëdtseeb ne. Kesentyent rap ne poder; ydendxee gyëzlyu wyenii kon xebtsa ne. **2** Kesentyent fwert wnii ne, re ne:

—Che wluzh gyëzroo, che wluzh gyëzroo ne la Babilonia; le we che nak ledne nuu menzab no ledne nuu yralondxee espíritu mal, le we che nak xeftxëës mamal ne rzhobee no ne nzaz.

**3** Porke yrandxee mengyëzlyu wak zegnak men ne rzudxen, wlaa men ne rlaan led men yra men mengyëz guin, no le yra rrey ne nuu gyëzlyu wlaa ne rlaan led yra men mengyëz guin; yrandxee mén ne nuu gyëzlyu ne rkaa gwtoo wakrik por tant wdee mengyëz guin lo beey wzii men.

**4** Zhich guin won noo wlen ste rëz gyeeybaa, re we:

—Guruu gyëz gwa yra de ne nak de xpén noo, chen ylaadet de dol yra de men ne nuu wa no chen sakzidet de zegne sakzi men; **5** porke che kesentyent wakndal xdol men, axtegue gyeeybaa wdxiiino, no kanzaleedx Dëdyuzh yrandxee ne mal ne wlaa men. **6** Gulaa men zegne wlaa ke men ste mén; txup tir gugyizh yka men por te te ne wlaa men; guzakzi men txup lal ne wzakzi men ste mén. **7** Gulaa ne kesentyent sakzi men no ne baanske ylaa men zegne wugya ke lextoo men no zegne wlaa ke men logne wlaantee men, porke re men lenlextoo men: “Noo zob nee zegnak men ne rnebéeý; nakdet noo byud no nunk kwiidet noo gyelenles.” **8** Por neguin tese dxe sakzi men lo yrandxee neree: lo gyelgut, lo gyelenles, lo gbiin, no tseeky men lo gyi; porke kesentyent rap Dëdyuzh poder ne ylaa Ne men zenga.

**9** Yrandxee rrey ne nuu ydendxee gyëzlyu ne wdee si wsegyee mengyëz guin lextoo ne wlaa rrey ne bat rkyiindet no ne wlaa rrey logne wlaantee rrey, goon rrey guin no baanske ylaa men chene kwii men ylen guux ne kayeeky gyëz guin. **10** Axtegue nat su men por tant gyelerdxeeb ne kazakzi gyëz guin, lex gue men:

—¡Prob de, prob de gyëz-Babilonia, gyëzroo ne kesentyent wap poder! Porke tebrategue wluzh de.

**11** Yrandxee mengyëzlyu ne rkaa gwtoo, goon men no baanske ylaa men por gyëz guin, porke gakyëtetre mén ne yka ne rtoo men. **12** Rtoo men: ne or, ne plat, gyezhaandxee, perla, lërlino ne fin, lërsed, lërmorad, lërnloo, no le yralondxee yag ne nzoon rree, no le ne nzhexkwaa kon leey tegzhol, no le ne nzhexkwaa kon yagzhaandxee, no le ne nzhexkwaa kon brons, no le ne nzhexkwaa kon gyiib, no le ne nzhexkwaa kon mármol, **13** no le kanel, no le yralondxee ne nzoon rree, no le ne nak zegnak yaal, no le mirra, no le perfum, no le bin, no le seyt, no le rin ne kesentyent nyu, no le zhobxtil, no le maa ne reey yúú, no le mëkzhiil, no le kabay, no le karret no axtegue mén. **14** No gue yra mén guin ne rkaa gwtoo:

—¡Che yëtenre de yra ne kesentyent rtseleedx de; wluzh yrandxee xgyelrik de no le yrandxee ne zhaandxee ne wap de! Nunk gapdetre do.

**15** Yrandxee mén ne rkaa rtoo yra neguin no ne wakrik por gyëz guin, su men axtegue nat por tant gyelerdxeeb ne kwii men pezee rak mengyëz guin

sufrir, baanske ylaa men, goon men, **16** gue men:

—¡Prob gyëzroo gwa! ¡Prob gyëzroo gwa! Wa wuu mén ne wak lërlino ne fin, lërmorad, no le lërnloo, no le ne nzhexkwaa kon ne or no le kon perla no le gyezhaandxee. **17** ¡Per tebrategue wluzh yrandxee xgyelrik gyëz gwa!

Yrandxee men ne rnexoon bark no le yrandxee men ne za lenbark no le yra men ne rlaa dxiin lenbark no le yra men ne rlaa dxiin lo nisdoo, wzu men axtegue nat, **18** chene wii men wlen guux ne kayeeky gyëz guin, kesentyent fwert re men:

—¡Pe nuuleg ste gyëzroo ne rzaglo gyëzroo gwa?

**19** Lex wdxiib men yudi xtoo men, baanske rlaa men, roon robtsaatee men, re men:

—¡Prob gyëzroo gwa! ¡Prob gyëzroo gwa! Kon xgyelriko wakrik yrandxee mén ne rap bark, ¡per tebrategue wluzho!

**20** Yrandxee de ne nuu de gyeeybaa, guzhiilen por yra ne wzak gyëz gwa, no guzhiilen laa de ne nak de xpén Dëdyuzh no le laa de ne nak de poxter no le laa de ne nak de profet; porke gyelextis wlaa Dëdyuzh lo mengyëz gwa por yra ne wlaa men de.

**21** Zhich guin wlis te angel ne kesentyent ndíp te gyeroo ne

nak zegnak xgye molin, wtxoon no lo nisdoo, re ne:

—Babilonia gyëzroo, zeree ke nitlo de no nunk kwiidetre mén de. **22** Nunk gondetre mén gool musk ruxnëz de, musk ne rool arpa, musk ne rool flawt, musk ne rool trompet, ni tsuudetre ni te mén ne rlaa dxiin wa, ni xgye molin yzheedxdetre wa. **23** No nunkre ykaadetre bnii wa, ni dooy tsuudetre wa; porke yra xpén de ne wkaa gwtoo wa, laa men nak ne mazre waknon-dee ydendxee gyëzlyu porke wkade de mén ne nuu ydendxee gyëzlyu kon xgyelebruj de.

**24** Laa gyëz gwa nak ne rap dol ne wket mén yra profet no le yra xpén Dëdyuzh no le yrandxee mén ne wet ydendxee gyëzlyu.

**19** **1** Wluzh wak yra neree, won noo wlen zegnak xrëz ndalyaa ndalduxtee mén gyeeybaa, re we:

¡Kesentyent nزون XDëdyuzh be!

Laa Ne wselaa be lo dol. Por laa Ne nak gyelnon no laa Ne rap poder.

**2** Porke laa Ne si nli rlaa gyelextis no xnëz rlaa No,

porke wguu Ne xkastig mengyëzroo gwa ne wak zegnak wnaa ne rkano wren wren mgyeey.

Laa men wxiin yrandxee mén ne nuu gyëzlyu kon ne nzaz ne wlaa men;

le Ne che wboo xgyelnaa lo mengyëz gwa ne wket men yra mén ne wlaa xdxiiin Ne.

**3** Zhich guin wlen yra rëz guin ste, re we:

—¡Kesentyent nزون Dëdyuzh! No nunk kwëzdet ylen guux ne reeky gyëz gwa.

**4** Orguin wzuzhib yra galeb-tap mengol no le yra ydap menmbán axtegue wtee lo men lyu, wzaknon men Dëdyuzh ledne zob Ne rnebëéy Ne, re men:

—¡Zengaw! ¡Kesentyent nزون Dëdyuzh!

**5** Lex wlen te rëz axtegue lo xyagzhil Dëdyuzh ne zob Ne rnebëéy Ne, re we:

Gusaknon XDëdyuzh be yrandxee de ne rlaa de xdxiiin Ne

no ne raknzëbnëz de lo Ne, nigle men ne non, nigle men ne zhi non.

**Xdooy Men ne nak zegnak mëkzhiil bëen bëenleg**

**6** No won noo wlen zegnak xrëz ndalyaa ndalduxtee mén, zegnak ledne rube gyowroo no zegnak chene kesentyent ratsyaa ngwzii, re we:

¡Kesentyent nزون

Dëdyuzh! Porke laa Ne rnebééy; laa Ne nak XDëdyuzh be no kesentyent rap Ne poder.

**7** Yoo yzhiilen be, kesentyent yzhiilen be no saknzoon be Dëdyuzh, porke le or ne gak xdooy Men ne nak zegnak mëkzhiil bëen bëenleg che wdxiiin.

Le nzeb ne gak xewnaa men che list nak.

**8** Laa nzaap guin neden gak lërlino ne fin, ne ndaa no ne axtegue rkabnii.

Lërlino ne fin rna yra ne xnëz ne wlaa xpén Dëdyuzh.

**9** Zhich guin na angel lo noo:

—Gukagyiich: “Nzoon mén ne nak myooz lo xdooy Men ne nak zegnak mëkzhiil bëen bëenleg.”

No na ne lo noo:

—Xdiiz Dëdyuzh nak diizree, nli we.

**10** Orguin wzuzhib noo lo angel guin chen saknon noo ne, per na ne lo noo:

—Ylaadet de zegwa, porke nozke xdxiiin Dëdyuzh rlaa noo zegne rlaa ke do yra de xkompanyer de ne zanal diznli ne wzëët Jesucrist. Dëdyuzh gusaknon.

Porke diiz guin ne wzëët Jesucrist nak ne rguu lextoo yra profet ne rzëët xdiiz Dëdyuzh.

## Men ne mbib kabay ngyich

**11** Wluzh nga wii noo zemyal gyeybaa, lex wii noo zu te kabay ngyich. Le men ne mbib kabay guin la Men ne rkadedet no Men ne nli rnii, porke xnëz rlaa men gyelextis no xnëz ke rdil men.

**12** Rkabnii bzalo men zegnak bël ne rlen lo gyi, le xtoo men zob ndal koron, no ka te la men led men; rutlel nandet gan pe rna we, sinke nonchee laa men nano. **13** No nak men te lër ne wluzhlo wluzhlondxee ren.

**14** No zadnal yra men ne nuu gyeybaa men; teblose lërlino ne ngyichdoo no ne ndaa nak yra men guin no teblose kabay ngyich zambib men. **15** Ruu mén guin ne la Xdiiz Dëdyuzh rlen te spad ne ndux lo chen yzakzi men yra mengyëzlyu no ynebééy men lo mén kon te bargyiib. Yzakzi men mén zegnak men ne rxii ub chen yruu xgyelnaa Dëdyuzh. Kesentyent rap Ne poder. **16** Lo xab men no le kuur men ka: “Rrey ne nak rrey lo yrاندxee rrey, Men ne rnebééy lo yrاندxee men ne rnebééy.”

**17** Zhich guin wii noo te angel ne zuli lo ngbiz, wkarëzyaa ne yrاندxee maa ne rzhobee, re ne:

—Gutaa, gubig yra de chen guxsëë de yra ne ndal ne

wseleedx Dëdyuzh por laa de. **18** Gugu xbëël yra rrey, xbëël soldad ne rnebééy, xbëël men ne nzholeedx, xbëël kabay, xbëël mén ne mbib kabay, xbëël yrandxee mén, nigle mén ne ka liber, nigle mén ne che wdo, nigle mennon, nigle men ne zhi non.

**19** Zhich guin wii noo mazab no le yra rrey ne nuu gyëzlyu ndxin rrey yra rrey xsoldad rrey chen tilno rrey mén guin ne mbib kabay yra men xpén men. **20** Lex wzuun mazab yrup ma profet guin ne noze rkade no ne wlaa gyelmilaguer nes lo mazab; por gyelmilaguer guin wkade profet yra mén ne wdee si wkaa xbeey mazab led no ne wzaknon xebneb mazab. Mbán ma wroon ma lo gyireni ne rasbël kon azufre yra ma profet ne noze rkade. **21** Le stebéd xpén mazab wet kon spad ne rlen ruu mén guin ne mbib kabay, no axtegue wzak lextoo yra maa ne rzhobee por tant wu ma bëël led yra mén guin.

### Temil iz

**20** **1** Zhich guin wii noo te angel, wruu ne gyeybaa zëdtseeb ne, nzen ne gyiblewpos ne kesentyent gyët no nzen ne tebla kaden-roo. **2** Wnëëz angel guin dragón ne nak mëël axtegue chekwlal,

mëël ne nak menzab no ne nak Bzelo; wliib angel ma kon kaden temil iz. **3** Lex wtxoon ne ma lenpos ne kesentyent gyët, lex wtsëchiich no, wguu ne te beey led, chen yruudet ma ykakader ma yra mén ne nuu ydendxee gyëzlyu axtegue ne yzaa temil iz. Zhich guin ysela ke ne maa, per yläádetre ma xche.

**4** No wii noo ndxin yagzhil ne kesentyent nzoon rnaa, lo yra yagzhil guin zob yra mén ne wkakwent poder chen ylaa men gyelextis. No wii ke noo yra xanem men ne wtxugnëz mén xtoo por ne wzëët men xkwent Jesucrist no por ne wzëët men xdiiz Dëdyuzh; yra mén guin wzaknondet men mazab ni xebneb maa, ni wdeedet men si ne nkaa xbeey ma xudx men o nya men. No wii noo wban men, wnebééy men yra men Jesucrist temil iz. **5** Laa primer ne wban mengut nga. Per le stebéd mengut, wbandet men axtegue ne wzaa temil iz. **6** ¡Nzoon yra xpén Dëdyuzh men ne yban primer! Che teedet men kastig ne nak gyelgut ne wrup, sinke laa men gak xefxuz Dëdyuzh no le xefxuz Jesucrist, yra men Ne ynebééy temil iz.

**7** Chene yzaase temil iz, yläá Bzelo ledne nunyoow Bzelo, **8** lex yruu Bzelo ykade Bzelo yra mén ne nuu ydendxee gyëzlyu, ykade Bzelo Gog no

Magog, ytop Bzelo men yra men chen tsa men lo dil. Kesentyent ndalyaa ndalduxtee yra mén guin zegne ndal yuzh ne ndxin runisdoo. **9** Ydendxee gyëzlyu yrëets yra mén guin, noze guloo men ledne nuu xpén Dëdyuzh no le xgyëz Ne ne ryaan Ne; per ynelen Ne gyi gyeybaa tseky yrandxee mén guin. **10** Le Bzelo ne wkade yra mén guin yroon ledne nuu gyirenii ne rasbël kon azufre ledne wroon ke mazab yrup ma profet guin ne noze rkade. Nga nak ne sakzi Bzelo dxe gyëeltee yra Bzelo mazab guin no le profet guin ydeblo siguelendxee.

### Gyelextis ne ylaa Dëdyuzh

**11** No wii noo te yagzhil-roo ne ngyich no ne kesentyent nsoon rnaa no wii noo zob Dëdyuzh lo we. Nes lo Ne wnitlo gyëzlyu gyeybaatee, axtegue rutre wiidetro. **12** No wii noo zuli yra mengut nes lo yagzhil guin, nigle men ne non, nigle men ne zhi non. Orguin wyal lo yra liber ne ka yra ne wlaa te te mén, no wyal lo ste liber ne ka la yrandxee mén ne rap gyelembán ne nunk luzhdet. Lex wak gyelextis lo mengut segun ne wlaa men te te men zegne ka lo yra liber guin. **13** Wdekwent nisdoo yra mén ne wet lo nisdoo, wdekwent ke gyelgut

yra mengut, zenga ke ledne nuu mengut wdekwento yra mengut; yrandxee mengut guin wak gyelextis lo men segun ne wlaa men te te men. **14** Zhich guin wroon gyelgut lo gyirenii yrupo ledne nuu mengut. Gyirenii guin nak gyelgut ne wrup. **15** No nga ke wroon yra mén ne kagyiiichdet la lo liber ne ka la yrandxee mén ne rap gyelembán ne nunk luzhdet.

### Gyeybakweb no gyëzlyukweb

**21** **1** Zhich guin wii noo te gyeybakweb no le te gyëzlyukweb; porke gyeybaa ne wuu primer wnitlo we no wnitlo ke gyëzlyu ne wuu primer, no yëtre nisdoo. **2** No wii noo, nes lo Dëdyuzh wruu xgyëz Ne gyeybaa wyabo gyëzlyu, gyëz guin nak Jerusalén-kweb; kesentyent nzhexkwaa we zegnak te nzaap ne che wal ytsëlnya. **3** Lex won noo wlen te rëz ne kesentyent fwert gyeybaa, re rëz guin:

—Le Dëdyuzh che wlenza lad mén, nee tsuu Ne yra Ne men; laa men gak xpén Ne, laa Ne gakknonen men, laa Ne gak XDëdyuzh men. **4** Ykwiidx Ne nis lo men, nunk goondetre men; tsuudetre gyelgut, ni tsuudetre gyelenles, ni gyele-rzebyoob; porke yrandxee ne wuu chekwlo, che wluzho.

**5** Orguin re Dëdyuzh:

—Noo rлакweb yrاندxee kos.  
No na Ne lo noo:

—Gukagyiih yra neree,  
porke diizree nli we, ryal ne  
ylaleedx méno.

**6** Zhich guin na Ne:

—Le we yra we che wak. Noo  
nak zegnak leter A ne rzelo yrاند  
xee leter, noo ke nak zegnak  
leter Z ne ryal yrاندxee leter;  
noo nak ne wzhexkwaa yrاند  
xee ne nuu, noo ke nak ne  
yluzho. Mén ne rlaan nis, noo  
ydee nisbzin ne rguu gyelembán  
goo men noze xla, bet gobdet  
noo. **7** Log mén ne gun gan ne  
yلاادetre dol, laa men nak ne  
gueden yrاندxee neree; noo  
gak XDëdyuzh men, laa men  
gak zhiin noo. **8** Per le mén ne  
rdxe, no le mén ne rlaleedxdet  
noo, no le mén ne rlaa ne nzaz,  
mén ne rket semén, mén ne  
rkanogue xkompanyer chene  
gardet ytsëlnya men, mén ne  
rlaa gyelebruj, mén ne rzaknon  
mdoo, mén ne noze rkade, yra  
mén guin che nunla men ne  
tsa men lo gyirenii ne rasbël  
kon azufre. Gyirenii guin nak  
gyelgut ne wrup.

**Jerusalén-kweb**

**9** Zhich guin wdxiid te ke  
angel ne nak angel guedx ne  
nzen bas ne yzaa yra guedx  
gyelentoz ne lultim, lex na ne  
lo noo:

—Gutaa yluu noo nzaap ne  
gak xewnaa Men ne nak zegnak  
mëkzhiil bëen bëenleg lo de.

**10** Orguin waknonen Espíri-  
tu Sant noo, wano angel noo te  
xtoo gyeynzoo no ne gya, lex  
wluu angel Jerusalén ne nak  
xgyëz Dëdyuzh lo noo; orguin  
wii noo nes lo Dëdyuzh wruu  
we gyeybaa wyabo gyëzlyu.  
**11** Kesentyent rkabtsa gyëz guin  
kon xebtsa Dëdyuzh, nak xebtsa  
we zegnak xebtsa te gye ne  
kesentyent zhaandxee, zegnak  
gye ne la jaspe, no axtegue rna-  
bider ne ndebnii we. **12** Kbi  
gyëz guin ka fchin ne kesen-  
tyent nzoo no ne kesentyent  
gya; chibtxup yaglaa ka fchin  
guin; te te ruyaglaa guin zu  
tegue angel; no te te led yaglaa  
guin ka tegue la yra chibtxup  
xpee Israel. **13** Tap lad rap fchin  
guin; tsongue yaglaa ka te te  
lad. **14** Chibtxup gye nuu xsi-  
myent fchin ne nzëë gyëz guin;  
te te lo gye guin ka tegue la yra  
chibtxup xpoxtor Men ne nak  
zegnak mëkzhiil bëen bëenleg.

**15** Angel guin ne wnii lo noo,  
nzen ne te gobkyi-or chen ydiix  
ne gyëz guin no chen ydiix ne  
yra xyaglaa we no le fchin ne  
zemzëë we. **16** Noze kwadrad  
nak gyëz guin, nigle xgyele-  
ngoolo, nigle xgyelenzheno tese  
lal rga we. Lex wdiix angel gyëz  
guin kon gobkyii ne nzen ne;  
rga we txupmilno-txupgywuu



kilometro. Xgyelengoolo, xgyel-gya we, xgyelenzheno tese lal rga we. **17** Zhich guin wdiix ne fchin ne nzëë gyëz guin; rga we tsonlalno-tap meter; zegnak medid ne rkyiinen mén, medid guin ke wkyiinen angel guin.

**18** Kon gye ne la jaspe nzhexkwaa fchin guin, le gyëz guin nzhexkwaa kon teblöse or ne rnaa zegne rnaa bider ndaa. **19** Gye ne nuu xsimyent fchin guin, kesentyent nzhexkwaa we kon yralondxee gyezhaandxee: ne primer nak kon gye ne la jaspe, ne wrup nak kon gye ne la zafiro, ne wyon nak kon gye ne la ágata, ne wzaa we tap nak kon gye ne la esmeralda, **20** ne wzaa we gaay nak kon gye ne la ónice, ne wzaa we xuup nak kon gye ne la cornalina, ne wzaa we guedx nak kon gye ne la crisólito, ne wzaa we xun nak kon gye ne la berilo, ne wzaa we gaa nak kon gye ne la topacio, ne wzaa we chii nak kon gye ne la crisoprasa, ne wzaa we chibteb nak kon gye ne la jacinto, le ne wzaa we chibtxup nak kon gye ne la amatista. **21** Yra chibtxup yaglaa guin kon chibtxup perla nzhexkwaa we; te te yaglaa guin kon tegue perla nzhexkwaa we. Le nëzyu ne za lenlgyëz guin, teblöse or nako, axtegue rnaa we zegne rnaa bider ne ndebnii.

**22** Ni te ydoo wiidet noo lenlgyëz guin, porke laa Dëdyuzh nak ydoo gyëz guin yrup Ne Men ne nak zegnak mëkzhiil bëën bëënleg. **23** Rkyiinden gyëz guin ngbiz ni mëëw ne yzenii, porke xgyelenzoon Dëdyuzh nak ne rzenii lenlgyëz guin, no laa Men ne nak zegnak mëkzhiil bëën bëënleg nak bnii gyëz guin. **24** Yrandxee men-gyëzlyu ne wláá lo dol saa lo xebnii gyëz guin; nga tsasan yra rrey ne nuu ydendxee gyëzlyu yra ne nzoon no yra ne non ne rap men. **25** Nunk yzëëdet xyaglaa we, porke tsuudet gyëël nga, nonchee yedxe tsuu. **26** No ydxii men nga ydxinneey men yra ne nzoon no le yra ne non ne nuu ydendxee gyëzlyu. **27** Per nunk teedet ne mal nga, ni mén ne rlaa kos ne mbixleedx, ni mén ne rkade, sinke nonchee mén ne kagyiich la lo liber ne ka la yrandxee mén ne rap gyelembán ne nunk luzhdet; liberree xliber Men ne nak zegnak mëkzhiil bëën bëënleg nako.

**22** 1 Wluzh nga wluu angel te gyoow ne nuu nis ne kesentyent nya lo noo, nis guin nak ne rguu gyelembán; axtegue rnabider ne ndebnii we; ledne zu xyagzhiil Dëdyuzh ne zob Ne rnebëéy Ne yrup Ne Men ne nak zegnak mëkzhiil bëën bëënleg, nga rlen nis guin.

2 Gwrooltee nēz ne za lenlgyēz guin za gyoow guin no ydixyda we zob yag ne rguu gyelembán; chibtxup tir rkaa nex lo we te iz, kada mēēw rkaa nex lo we, le xgyizho rkyiin por ne gakngyēēlre yrandxee men-gyēzlyu. 3 Tsuudet ne mal nga. Nga su xyagzhil Dēdyuzh ne sob Ne ynebééy Ne yrup Ne Men ne nak zegnak mēkzhiil bēēn bēēnleg, no yrandxee mén ne rlaa xdxiiin Ne saknon men Ne. 4 Swii men Ne, no ykaa la Ne xudx men. 5 Tsuudetre gyēēl nga, no yra mén ne tsuu nga, che ykyiindenre men bnii ne yzenii ni xebnii ngbiz, porke laa Dēdyuzh nak ne yzenii, no laa men yra men nak ne ynebééy ydeblo siguelendxee.

### Che wyob chiid Jesucrist

6 Lex na angel lo noo:

—Yra diizree nli we; ryal ylaléedx méno. Laa Dēdyuzh rguu lextoo yra profet, laake Ne wxaal xangel Ne chen yluu xangel Ne lo yra mén ne rlaa xdxiiin Ne yra ne che wyob gak.

7 Zeree re Jesucrist:

—¡Schiidgue noo!

Nzoon mén ne rukas rlaa yra ne zēēd lo gyiichree ledne zēēd yra ne gyed gak.

8 Noo nak Xwa, noo nak ne won no ne wii yra neree. Chene wluzh won noo we no ne wii

noo we, wzuzhib noo lo angel ne wluu yra neree lo noo, chen saknon noo ne. 9 Per na ne lo noo:

—Ylaadet de zegwa, porke nozke xdxiiin Dēdyuzh rlaa noo zegne rlaa ke do yra de xkompanyer de ne nak profet no le yra de men ne rukas rlaa yra ne zēēd lo gyiichree. Dēdyuzh gusaknon.

10 No na ne:

—Ykeedxdet de yra ne gyed gak ne zēēd lo gyiichree, porke che wyob gako. 11 Zeka menmal ylar men ne mal, zeka mennzaz ylar men ne nzaz, le menwen zeka men ylar men ne wen, no zeka men ne rlaadet dol yer men gan pezee ylaadetre men dol.

12 Zeree re Jesucrist:

—Schiidgue noo, chidneey noo ne ydee noo lo te te mén, segun ne wlaa men te te men. 13 Noo nak zegnak leter A ne rzelo yrandxee leter, noo ke nak zegnak leter Z ne ryal yrandxee leter; noo nak men primer, noo ke nak men lultim; noo nak ne wzhexkwaa yrandxee ne nuu, noo ke nak ne yluzho.

14 Nzoon men ne raa xab chen gap men derech gu men nex ne rkaa lo yag ne rguu gyelembán no chen gap men derech tee men nes ledne ka yaglaa gyēz guin. 15 Per le yra men ne nak zegnak mēēk,

yra men ne rlaa gyelebruj, yra men ne rkanogue xkompanyer chene gardet ytsëlnya men, yra men ne rket mén, yra men ne rzaknon mdoo, no yra men ne tebegue rkade no ne rtseleedx rkade, fwer gyan men yra men.

**16** —Noo nak Jesus, wxaal noo xangel noo chen yzëet xangel noo yra neree lo de, chen yzëet do lo yra xpén noo. Noo xnëz David zëed noo, XPee David nak noo, noo nak zegnak mël ne rul reekyendxee ne rlen rsil.

**17** Re Espíritu Sant no le nzaap ne gak xewnaa Men ne nak zegnak mëkzhiil bëen bëenleg:

—Gutaa.

Yra mén ne gon neree, gue men:

—Gutaa.

No yrandxee mén ne rlaan nis no ne rlaan goo we, chiid

men goo men nis ne rguu gyelembán noze xla, bet gaknondeto.

**18** Yrandxee mén ne che ron diiz ne zëed lo gyiichree ledne zëed yra ne gyed gak, guegue noo lo men: Belne nuu mén rdxibre diiz ne che zëed lo gyiichree, stsowndalre Dëdyuzh yra gyelentoz ne zëed lo gyiichree ne sak men. **19** Belne nuu mén ygyitxee diiz ne zëed lo gyiichree ledne zëed yra ne gyed gak, seyuu Dëdyuzh la men lo liber ne ka la yrandxee mén ne rap gyelembán ne nunk luzhdet no ydeedet Ne si tee men xgyëz Ne ne rakzëet lo gyiichree.

**20** Men ne rzëet yra neree re: —Che wyob chidleenendxee noo.

Zengaw. ¡Gutaa Jesucrist!

**21** Jesucrist gaknonen de yra de.

Zengaw.